

## Headlines

- 1 कुवैत च अग्ग लगने दी घटना च मारे गेदे भारतीय नागरिकें दे पार्थिव शरीर लेइयै वायु सेना दा विशेष जहाज अज्ज बडलै कोची हवाई अड्डे उप्पर पुज्जेआ।
- 2 प्रधानमंत्री नरेन्द्र मोदी होरें ईटली च जी-7 शिखर सम्मेलन दे बक्ख-बाहरें केई दबक्खी बैठकां लाइयां।
- 3 अज्ज गांदरबल च क्षीर भवानी मेले च 30 जहार शा मते श्रद्धालुएं मत्था टेकेआ। उपराज्यपाल मनोज सिन्हा होरें गलाया जे यात्रुएं दी सहूलत लेई अगले 8 महीनें च यात्री निवास तैआर करी दित्ता जाग।
- 4 शिक्षा मंत्री धर्मेन्द्र प्रधान होरें गलाया जे केन्द्र सरकार नीट परीक्षार्थिं दे हितें दे राक्खी लेई वचनबद्ध ऐ।

<><><><><><>

## Kuwait Fire Incident

कुवैत च अग्ग लगने दी घटना च मारे गेदे 45 भारतीय नागरिकें दा पार्थिव शरीर लेइयै वायुसेना दा विशेष जहाज अज्ज बडलै कोची अंतर्राष्ट्रीय हवाई अड्डे पर पुज्जेआ। कोचीन अंतर्राष्ट्रीय हवाई अड्डे उप्पर 31 शव उतारे गे। जंदे बुधवार कुवैत दे मंगफ इलाके च श्रमिक दे रोहने आले इक आवास सुविधा च अग्ग लगने दी घटना घटी ही। भारतीय सरकार नै कल विदेश मामले दे राज्य मंत्री कीर्ती वर्धन सिंह होरें गी कुवैत रवाना कीता हा तां जे ओह कुवैत सरकार कन्नै राबता कायम करी तौले थमां तौले घटना च मारे गेदे भारतीय नागरिकें दे शवें गी भारत पजाई सकन ते घायलें दी हालत दा बी पता लाई सकन। अज्ज बडलै मृतकें दे शवें दे केरल पुज्जने मगरा विदेश मामले दे राज्य मंत्री होरें कुवैती प्रशासन दा इस पूरी प्रक्रिया च सैहयोग देने लेई आभार जताया।

<><><><><><>

## PM-Bilateral

प्रधानमंत्री नरेन्द्र मोदी होर जी-7 शिखर सम्मेलन च हिस्सा लैने लेई ईटली पुज्जे। श्री मोदी होरें केई मुखें दे प्रमुख कन्नै दबक्खी बैठक कीती। मोदी होरें दपैहरी फ्रांस दे राष्ट्रपति इमैनुएल मैक्रों हुंदे कन्नै मलाटी कीती। दौनें नेताएं रक्षा, परमाणु, अंतरिक्ष, शिक्षा, जलवायु क्षेत्र च कारवाई, डिजिटल सार्वजनिक बुनियादी ढांचे, महत्वपूर्ण प्रौद्योगिकीएं, कनेक्टिविटी ते संस्कृतिक दे क्षेत्र च अपनी सांझेदारी गी होर मजबूत करने पर चर्चा कीती। उनें प्रमुख वैश्विक ते क्षेत्रीय मुद्दें पर बी बचार दा आदान-प्रदान कीता। ओह मेक इन इंडिया पर मता ध्यान केन्द्रित करने दे कन्नो कन्नी रणनीतिक रक्षा सैहयोग गी होर तेज करने पर सैहमत होए। दौनें नेताएं अगले साल फ्रांस च आयोजित होने आले आँदे आर्टिफिशल इंटेलीजेंस शिखर सम्मेलन दे सरबंघे च मिलियै कम्म करदे होई आर्टिफिशल इंटेलीजेंस उभरती तकनीकें ऊर्जा ते खेड्डें दे क्षेत्र च सैहयोग दा विस्तार करने पर बी सैहमति प्रकट कीती। उनें इस गल्ला पर जोर दित्ता जे इक स्थिर ते समृद्ध वैश्विक बवस्था आस्तै भारत ते फ्रांस बशकार इक मजबूत ते भरोसेमंद रणनीतिक सांझेदारी जरूरी ऐ। प्रधानमंत्री मोदी होरें राष्ट्रपति मैक्रों होरें गी आँदे पेरिस ओलंपिक ते पैरालोंपिक खेड्डें आस्तै अगेत्री शुभकामना दित्ती। प्रधानमंत्री नरेन्द्र मोदी होरें बरतानिया दे अपने हमरूतबा ऋषि सुनक हुंदे कन्नै बी मलाटी कीती। सोशल मीडिया पोस्ट च मोदी होरें आखेआ जे भारत ते बरतानिया बशकार भ्याली गी होर बी मजबूत करने दी अपनी वचनबद्धता दोहराई। मोदी होरें यूक्रेन दे राष्ट्रपति बालादीमी जलेंस्की हुंदे कन्नै बी मलाटी कीती। दौनें नेता यूक्रेन दी स्थिति पर चर्चा कीती ते दबक्खी रिश्ते पर बी गल्लबात होई।

<><><><><><>

## PM G7 Meet

प्रधानमंत्री नरेन्द्र होर जी-7 आउटरीच शिखर सम्मेलन च हिस्सा लैने आस्तै ईटली गेदे न। ओह जी-7 आउटरीच शिखर सम्मेलन च हिस्सा लैने लेई ईटली दी प्रधानमंत्री जार्जिया मेलोनी हुंदे साददे पर गेदे न। शिखर सम्मेलन दे बाहरें उनें केई सारियां दबक्खी बैठकां लाइयां ते विश्व नेताएं कन्नै मलाटी कीती। प्रधानमंत्री दे तौर पर त्रिए बारी औहदा सांभने मगरा एह उंदा पैहला विदेशी दौरा ऐ। रवाना होने थमां पैहले मोदी होरें आखेआ हा जे सरकार भारत-ईटली रणनीतिक सांझेदारी गी

तगड़ा करने ते भारत-प्रशांत क्षेत्र च सैहयोग गी बढ़ावा देने लेई वचनबद्ध ऐ। उनें आखेआ हा जे शिखर सम्मेलन दरान मुख् करी ध्यान आर्टिफिशल इंटेलीजेंस, ऊजा, अफ्रीका पर दिक्ता जाग। जी-7 च कनाडा, फ्रांस, जर्मनी, ईटली, जापान, बरतानिया ते अमरीका शामन ऐ।

<><><><><><>

### **Jual Oram Tribal Affairs**

कैबिनेट मंत्री जुएल ओराम होरें नमीं दिल्ली च जनजातीय मामले दे मामलें दे मंत्रालय दा कम्मकाज सांभी लैता ऐ। मगरा उनें इक प्रेस कांफ्रेंस च आखेआ जे त्रीह बारी मंत्रालय दा कम्मकाज सांभना सम्मान आली गल्ल ऐ। आदिवासिएं दी बुनियादी जरूरतें गी लेइयै उनें आखेआ जे मंत्रालय दी पैहली प्राथमिकता आदिवासी क्षेत्रें च शिक्षा दे नेटवर्क गी मजबूत करना ते सेहत क्षेत्र गी बढ़ावा देना ऐ।

<><><><><><>

### **Blood Donar Day(byte)**

जम्मू कश्मीर दी भारतीय रैड क्रॉस सोसायटी नै हर ब'रे 14 जून गी मनाए जाने आले विश्व रक्तदाता दिवस दे मौके पर रक्तदाता शिविर दा आयोजन रैड क्रॉस भवन कच्ची छावनी जम्मू च कीता। एहदा आयोजन गौरमेट मैडिकल कालेज अस्पताल जम्मू नै ब्लड ट्रांसफ्यूशन विभाग गी सांझे भ्याली कन्नै कीता। इस कैंप च एसबीआई बैंक दे अधिकारिएं सनें बैंक ऑफ बड़ोदा, जम्मू कश्मीर बैंक प्राइवेट लिमिटेड, डॉबर इंडिया लिमिटेड, सिडको इंडस्ट्रीज कंपलेक्स बड़ी ब्रहमणा ते रैड क्रॉस दे स्वयं सेवीएं बधी चढ़ियै हिस्सा लैता। कैंप दा उद्घाटन भारतीय रैड क्रॉस सोसायटी जम्मू कश्मीर दे महासचिव रोहित खजूरिया ते ब्लड बैंक जीएमसी अस्पताल जम्मू दे डॉ. रजत कुमार होरें कीता। इस मौके उपपर बोलदे होई महासचिव होरें गलाया

<><><><><><>

### **WPI May Data**

थोक मँहगाई दर मई च बधी ऐ ते एह 15 म्हीने च सब्बने थमां मती उंचाई पर पुज्जी ऐ। मंत्रालय आस्सेआ जारी आंकड़े मूजब बरोबर करी खाने पीने आली चीजें, उत्पादें, कच्चे तेल, कुदरती गैस ते उत्पादन सरबंधी सेक्टरें च होए दे बदलाव होई सकदा ऐ।

<><><><><><>

### **LG-Kheer Bhawani**

उपराज्यपाल मनोज सिन्हा होरें अज्ज गांदरबल जिले दे माता क्षीर भवानी मंदरै च मत्था टेकेआ। पत्रकारें कन्नै गल्ल करदे होई उपराज्यपाल होरें गलाया जे इस बारी 30 जहार शा मते श्रद्धालुएं माता दे मंदरै च दर्शन कीते। जम्मू थमां 200 बसें च श्रद्धालु क्षीर भवानी मंदरै लेई पुज्जे। उपराज्यपाल होरें गलाया जे प्रशासन ट्रस्ट ते मकामी लोकें मंदरै च मत्था टेकन आए द श्रद्धालुएं गी हर सुविधा देने दे लोड़चदे जतन कीते न। उनें गलाया जे पिछले ब'रे जदूं ओह इस मंदरै च आए हे ते किश यात्रुएं यात्री निवास दी मंग कीती ही ते मुत्तलका अधिकारिएं कन्नै गल्ल करियै अगले 8 म्हीने च 1 जहार यात्रुएं दे ठैहरने लेई यात्री निवास तैआर करी दिक्ता जाग। मुख् सचिव अटल डुल्लू होरें बी माता क्षीर भवानी दे दर्शन कीते ते मंदरै च मत्था टेकेआ।

<><><><><><>

### **Kheer Bhawani Mela**

अज्ज जेष्ठ अष्टमी ऐ, अज्ज जम्मू दे जानीपुर दे क्षीर भवानी मंदरै च केई सो श्रद्धालुएं मत्था टेकेआ। इस मंदर गी बी कश्मीर दे गांदरबल जिले च स्थित क्षीर भवानी श्राईन आला लेखा गै बनाया गेदा ऐ। हर ब'रे इस रोज लगने आला सलाना मेले च कश्मीरी पंडित समुदाय दे लोक हिस्सा लेंदे न। साढ़े संवाददाता नै जानकारी दिक्ती ऐ जे अज्ज बडलै थमां मंदरै च लोकें दा औना शुरू होई गेआ। मकामी प्रशासन आस्सेआ मेले लेई लोड़चदे सारे बंदोबस्त कीते गेदे न। उपराज्यपाल मनोज सिन्हा होरें जेष्ठ अष्टमी दे मौके पर सब्बनें गी शुभकामना दित्तियां, खास करी कश्मीरी पंडितें गी। उनें सब्बनें दी तरक्की ते खुशहाली दी कामना कीती। उनें माता क्षीर भवानी होरें गी सब्बनें गी सेई बत्त दस्सने दी प्रार्थना कीती। उनें मेद जाहर कीती जे एह जेष्ठ अष्टमी आपसी भाईचारे दी तंदें गी होर बी मजबूती प्रदान करोग।

<><><><><><>

